

佛說右繞佛塔 功德經

唐于闐三藏實叉難陀譯



南無本師釋迦牟尼佛

說明

本繁體校正版《佛說右繞佛塔功德經》電子書，根據《乾隆大藏經》大乘單譯經，第 0454 部，唐于闐三藏實叉難陀譯《佛說右繞佛塔功德經》影印本校正，句讀僅供參考。

本電子書是免費結緣品，特此說明。

仁慧草堂

二〇一九年二月



掃碼關注仁慧草堂微信公眾號

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

淨口業真言

(三編)

唵. 修唎. 修唎. 摩訶修唎. 修修唎. 薩婆訶.

淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

普供養真言

(三編)

唵. 誚誚曩. 三婆嚩. 禡日囉斛.

南無本師釋迦牟尼佛（合掌三稱）

開經偈

（一編）

無上甚深微妙法 百千萬劫難遭遇
我今見聞得受持 願解如來真實義

佛說右繞佛塔功德經¹

唐于闐三藏實叉難陀譯²

如是我聞：

一時，佛在舍衛國祇樹給孤獨園，與大比丘僧及餘無量眾俱，前後圍遶。

爾時，長老舍利弗即從坐起，偏袒右肩，右膝著地，合掌向佛，以偈請曰：

大威德世尊 願為我等說
右遶於佛塔 所得之果報

爾時，世尊以偈答曰：

右繞於佛塔 所得諸功德
我今說少分 汝等咸善聽
一切諸天龍 夜叉鬼神等
皆親近供養 斯由右繞塔
在在所受生³ 遠離於八難
常生無難處 斯由右繞塔
於一切生處 念慧常無失
具足妙色相 斯由右繞塔

¹ 大正藏：右繞佛塔功德經

² 大正藏：大周于闐國三藏沙門實叉難陀等奉 制譯

³ 大正藏：生處；永樂北藏及龍藏：受生

往來天人中 福命悉長遠
常獲大名稱 斯由右繞塔
在於閻浮提 常生最尊勝
清淨種性⁴中 斯由右繞塔
儀貌常端正 富貴多財寶
恒食大封邑 斯由右繞塔
財寶恒⁵盈積 而無慳吝心
勇猛廣惠施 斯由右繞塔
色相淨微妙 見者皆欣仰
所住常安樂 斯由右繞塔
或為刹⁶利王 妻子悉具足
威勢力自在 斯由右繞塔
或作婆羅門 持戒善通達
呪術圍陀典 斯由右繞塔
或為⁷大長者 豪貴多財產
倉廩常豐足 斯由右繞塔
或為⁸正法王 自在王閻浮
率土咸歸化 斯由右繞塔
或為具七寶 大勢轉輪王

⁴ 大正藏：姓

⁵ 大正藏：常

⁶ 大正藏：忉

⁷ 大正藏：作

⁸ 大正藏：作

十善御群生 斯由右繞塔
從此生天上 常有大威德
淨信於佛法 斯由右繞塔
淨信速成已 於法無迷惑
見諸行皆空 斯由右繞塔
從天上捨命 下生於人中
入胎不迷亂 斯由右繞塔
在於母胎中 垢穢所不染
如淨摩尼珠 斯由右繞塔
處⁹胎及生時 令母常安樂
飲乳亦復然 斯由右繞塔
父母及親戚 一切共鞠養
乳母常不離 斯由右繞塔
眷屬皆愛念 超過其¹⁰父母
資財自增長 斯由右繞塔
夜叉諸惡鬼 不能暫驚怖
所須自然得 斯由右繞塔
經於百千劫 其身轉清淨
妙色相成滿 斯由右繞塔
淨眼修且廣 猶如青蓮花

⁹ 大正藏：在

¹⁰ 大正藏：於

兼得淨天眼	斯由右繞塔
妙色常圓滿	諸相自莊嚴
成就大勢力	斯由右繞塔
或生帝釋宮	大威勢自在
忉利天中尊	斯由右繞塔
或生須夜摩	兜率陀天宮
化樂及他化	斯由右繞塔
或復生梵天	梵世最自在
諸天常供養	斯由右繞塔
億那由他劫	常為諸智人
恭敬而供養	斯由右繞塔
其身及衣服	億劫常無垢
具足白淨法	斯由右繞塔
具大精進力	勤修種種行
未嘗有疲懈	斯由右繞塔
勇猛常精進	堅固不可壞
所作速成就	斯由右繞塔
深遠微妙音	聞者皆歡喜
安樂常無病	斯由右繞塔
如我所演說	厭捨三有苦
成就出世智	斯由右繞塔
常在四念處	及以四正勤

四如意神足 斯由右繞塔
了達四真諦 根力七覺分
正道及聖果 斯由右繞塔
滅一切煩惱 具足大威德
無漏六神通 斯由右繞塔
永離貪恚癡 及一切障礙
證獨覺菩提 斯由右繞塔
得妙紫金色 相好莊嚴身
現作天人師 斯由右繞塔
皆由以身業 及語業讚歎
右繞於佛塔 成¹¹此大利益
右繞諸佛塔 所得功德聚¹²
我今隨所問¹³ 略說詎能盡

爾時，世尊說此偈已，舍利弗等一切眾會，皆大歡喜，信受奉行。

佛說右繞佛塔功德經¹⁴

¹¹ 大正藏：獲

¹² 大正藏：諸功德；永樂北藏及龍藏：功德聚

¹³ 大正藏：聞

¹⁴ 大正藏：右繞佛塔功德經

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

補闕圓滿真言

(三編)

唵. 呼嚧呼嚧. 社曳穆契. 莎訶

普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無觀自在菩薩摩訶薩 (合掌三稱)

南無護法諸天菩薩 (合掌三稱)

禮佛發願文

(一編)

歸命十方調御師 演揚清淨微妙法
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

迴向偈

(一編)

願以此功德	莊嚴佛淨土
上報四重恩	下濟三途苦
若有見聞者	悉發菩提心
盡此一報身	同生極樂國

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙。和南
聖眾。



此咒置經書中可滅誤跨之罪

南无护法韦驮尊天菩萨

